



時間的斟酌

時間予人捎無摠，伊是天頂 tsih-tsuh 的雲炆，來無通知，去無相辭，袂停跤，嘛袂翻頭！聽候伊受氣變面，雷公爍爍損甲予人閃袂離。老歲仔人食過羹，苦勸少年人捌代誌，趁流水拚落去！骨力的一工日曠久，貧惰的一晷晷長。若是放放四界遊，連鞭人過四十天過晷，十做九不成。面對時間有兩個銳角，第一是愛衝，第二是毋通干焦顧衝。按怎撫搵，需要動頭殼，好禮仔斟酌一下。

拚勢的人苦袂得一工變兩工，數想有「猴齊天」的本等、「千手觀音」的法力，通共濟彌滿的檣頭舞予四序四序。有一齣心適的電影《Groundhog Day(今天暫時停止)》，男主角『Phil』予「鼯鼠」精靈處罰，逐工困醒攏是「全一工」，若像予水閘仔閘起來。頭起先伊毋知好歹，放揀家己，怨嘆上帝，自殺幾若擺。落尾總算覺悟，對懶屍變綿精，學法語、做冰雕、彈鋼琴、修理車、耍『khe-tsi-bang』特技.....。有才情、存好心、做善事，落尾拍破咒讖，得著幸福的人生。『Phil』演出兩款人，一款是損蕩時間的人，一款是惜略時間的人。咱是家己的導演，愛知戲齣袂當重搬，少年袂曉想，食老毋成樣。莫等到頭毛喙鬚白，才共「欲知.....就.....」當做喙口話，後半世人砣砣反詞典，共「後悔」兩字摺咧吼。

魚趁鮮，人趁苾，人生著愛衝衝衝！毋過若衝過頭就較糶才！臺灣阿美族的口傳文學〈女人國〉，古冊內底的寓言故事〈黃梁一夢〉、〈南柯一夢〉，攏提醒咱把握現此時，珍惜身軀邊。電影《Click(命運好好玩)》嘛有相嚮的劇情，男主角『Michael』暝日拍拚，魔神仔送伊神奇的「時間遙控器」，狂欲出脫的伊捎咧亂亂擲。結果一晃數十冬，老爸曲去、嬲某綴人去，囡仔的成長無參與的記持。最後睇伊一箍老孤孀，倒佇病院拖身命，這世人紡傷緊，未曾未強欲煞戲。

濟濟人跽上成功的山嶺，無張持越頭，才發現親情落勾，健康失覺察。得著虛華的江山，煞失去故鄉的田園，終其尾嘛是無較縫！道理參會透，嘛愛做會到。毋驚傷慢，只驚擋怙。有親情做靠山，心頭掠予定，啥物攏免驚！

作者：黃文達

☆詞彙學習☆

- | | |
|----------------------------|---------------------------|
| 【tsih-tsuh】：調皮。 | 【食過羹】 tsiáh-kuè-kinn：吃過虧。 |
| 【趁流水】 thàn-lâu-tsuí：把握好時機。 | 【撫搵】 tshiâu-tshik：調度。 |
| 【濟彌滿】 tsē-mí-muá：多不勝數。 | 【khe-tsi-bang】：撲克牌。 |
| 【惜略】 sioh-lióh：珍惜。 | 【喙口話】 tshuè-kháu-uē：口頭禪。 |

☆文法學習☆

【捎無摠】：抓不到要領。「無」是當中的否定詞。文中用到的閩南語否定詞有「無/bô」、「袂/bē」、「毋/m̄」、「不/put」、「莫/mài」、「未/buē」、「免/bián」七個。